

Ko e Paxlovid ko e vai tului mae tau tagata ne fai lekua ke he tau fuaifi



Ne age e Paxlovid ke he falu he tau tagata ke totoko aki e gagao kelea ko e COVID-19. To liga lagomatai a koe ke malolo vave mo e nakai uta ke he fale gagao.

Kaeke ke fai lekua e tau fuaifi haau, to liga ni kua lata ke tukutuku hifo e fafatiaga he vai Paxlovid ke inu. Kaeke ke pihia, kua lata ia koe ke inu e vai tului tuga mo e fakamaama he laupepa nei.

Ko e Paxlovid na taute mai he ua e tau vai tului gagao – ko e nirmatrelvir (tegavai lanu mame) moe ritonavir (tegavai lanu tea). Ka inu tokoua, to tuku hifo ki lalo e lahi he gagao moko kelea nei i loto ia koe. Ko e mitaki ni e Paxlovid kaeke ke inu e koe to hoko ke he 5 e aho tali mai he aho ne moua e koe e gagao COVID-19 mo e fifili ki ai e haau a tau ekekafo kua lata mo koe poke nakai.

Inu 2 e tegavai laga ua he aho ke 5 e aho he katoa tuga mo e fakamaama a na ki lalo



Ko e tau magaaho pogipogi oti

Inu 1 e tegavai lanu mame **MOE** 1 e tegavai tea
(na tuku he faahi ne lanu **ago** he vala ne foila)



Ko e tau magaaho afiafi oti

Inu 1 e tegavai lanu mame **MOE** 1 e tegavai tea
(na tuku he faahi ne lanu **moana** he vala ne foila)

Inu ke oti e tau vai tului ne kua fafati ki ai, ko e **5 e aho**.

Maeke ia koe ke inu e tau tegavai haau pete ni kua kai menakai pokua nakai kai ha menakai.

Aua neke taofi e inu he Paxlovid ka e nakai la tutala mo e haau a ekekafo, pete ni kua logona e koe kua malolo mai.

Talaage kehe haau a ekekafo e tau vai tului gagao oti haau ne fae inu

Ne ha ha i ai e falu vai tului foki ne ligaliga nakai mitaki ka fio mo e Paxlovid mo e kaeke ke inu fakalataha to liga ke fai logonaaga kelea lahi ka tupu mai ai.

- Talaage ke he haau a ekekafo poke tagata he fale talavai kaeke ke inu a koe poke kamata laia ke inu e falu foki he tau vai tului gagao, lalafi ki ai e tau vai moua aki e tau laupepa mai he ekekafo mo e tau vai moua ni ke he fale talavai ka e nakai fai laupepa mai he ekekafo, tau vai lagomatai ke moua e tau huhua mitaki mae tau tino mo e tau vai lagomatai ne moua mai he tau lau akau ikiiki (tuga e St. John's Wort).
- Aua neke kamata ke inu ke taha vai tului foou ka e nakai talaage ke he haau a ekekafo. To maeke he haau a ekekafo ke talaatu kia koe kaeke ke haohao mitaki ke inu e Paxlovid mo e falu vai tului foki.

Kaeke kua fai fafati kua nakai inu e koe



Kaeke kua nakai inu e koe e taha fafati vai **ki loto he 8 e tula** he magaaho ne kua fafati ke inu, fakamafiti ke inu he magaaho ka manatu e koe.



Kaeke ke **molea e 8 tula** he nimo e koe, tiaki e tau tegavai ke lata moe fafati ia kae inu e tau tegavai mae fafatiaga foou.



Aua ne lalafi ke inu foki e taha fafatiaga Paxlovid ke lata mae fafatiaga ne kua nimo.



Ko e tau logonaaga ne kelea lahi a na ne kua fakamau fakapapahi he lau na ne mui mai

Kua fakafua tama ka a koe poke lali a koe ke fai tama?



Kaeke kua fakafua tama a koe, tuaha kua fai tama a koe poke amanaki a koe ke fai tama he tau magaaho i mua, aua neke inu e koe e Paxlovid.

Huhu age ke he haau a ekekafo ke moua mai taha hatakiaga ha kua nakai lata ke inu e Paxlovid he magaaho ka fakafua tama a koe.

Kua lata e tau fifine ke kalo kehe mai he fakafua tama (ke tuga e, tau tegavai fakaokioki fanau poke nakai momohe mo e hoa) ke he magaaho ka inu he Paxlovid mo e 7 foki e aho ka mole e tau tuluiaga.

Mahuiga lahi e tau puipuiaga ke nakai fakafua tama

Kaeke ke inu a koe he tau tegavai taofi ke ua fakafua tama, kua lata lahi ke fakaeneene ha ko e mena maeke he Paxlovid ke fai lauiaaga ke he tau tegavai ia.

Kaeke ke taute a koe he matagahua feuaki, kua lata ia koe ke fakaaoga he tau konotomo ke lalafi atu ke he tau puhala fa mahani a koe ki ai he magaaho ka inu a koe he Paxlovid pihia ke he 7 e aho he mole e tau tuluiaga ia.

Ole atu ke he haau a ekekafo poke tagata talavai ke moua e tau hatakiaga.

Ko e fakahuhu tama ka a koe?

Kua nakai fai peehiaga ke fakahuhu tama he magaaho ka moua he tuluiaga pihia ke he 7 e aho he mole e inu e fafatiaga Paxlovid fakahiku.

Talaage FAKAMUA ke he haau a ekekafo ko e fakahuhu tama a koe to inu ke he vai tului nei.



Ke moua foki falu vala tala haggao ke he Paxlovid, finaatu ke he poko kupega hila hn.org.nz/paxlovid

Fai lauiaaga oti e tau vai tului

Maeke he Paxlovid ke fai lauiaaga ka logona, pete ia nakai moua he tau tagata oti.

Ko e tau lauiaaga kua fa mahani ai

Kua fa mahani ke logona tote mo e galo fakahaga poke magaaho ka taofi e vai tului. Talaage ke he haau a ekekafo kaeke ke fai lekua ke he tau logonaaga nei poke nakai galo:

- tafe e manava fakavao (hihi)
- hahalua e manava (koko)
- hikihiki e logonaaga haau ke he manogi he tau mena kai.

Kua nakai mahani lahi ke kitia, hagahagakelea lahi e tau logonaaga kua lauia ki ai

Matutaki atu fakamafiti ke he haau a ekekafo poke **Healthline he numela 0800 611 116** kaeke ke kitia e koe e tau lauiaaga nei mo e talaage ki ai ko e inu a koe he Paxlovid:

Ko e tau fakamailoga he tau logonaaga kua nakai lata mae tino:

- patapata kula e kili
- fufula poke fua e tau tuamata poke tau mata, fofoga, tau laugutu poke alelo
- okaoka e fatafata mo e uka ke fafagu.

ko e tau fakamailoga ne fakakite kua fai lekua ke he ate tuga e:

- lanu ago e tau mata mo e kili he kakano
- mamahi mo e hagahaga kelea vala ki luga he manava.